

# Dongeng singa jawab hujah wakil

KUALA LUMPUR, Ahad — Datuk Seri Dr Mahathir Mohamad hari ini menarik perhatian Perhimpunan Agung Umno dengan sebuah cerita dongeng dalam Aesop's Fables mengenai seekor Singa dan seorang Kristian.

Belliau menceritakan kisah itu sebagai mengulas hujah wakil Selangor, Datuk Harun Haji Idris, yang membuat analisa mengenai pengundian jawatan Presiden.

Dalam ucapan yang sama, bekas Menteri Besar Selangor itu juga menegur sikap kerajaan yang menurutnya tidak bersikap adil.

Menurut Perdana Menteri, kisah itu berlaku di zaman Rom yang ketika itu masih belum memeluk Kristian.

Satu permainan raja-raja Rom ketika itu ialah melepaskan singa dan manusia di dalam satu arena dan melihatnya berlawan.

Bila didapati singa itu hampir membinasakan orang itu, mereka akan memberi isyarat sama ada membiarkan orang itu dimakan oleh singa atau menyelamatkannya.

Mangsa yang digemari oleh maharaja-maharaja Rom ialah orang-orang Kristian. Dalam satu pertunjukan, seorang Kristian dilepaskan ke arena bersama seekor singa ganas yang biasa memakan manusia.

Anehnya, singa itu tidak menyerangnya. Melihat kejadian itu, orang Kristian itu dibebaskan.

Orang Kristian itu turut kehairanan sehingga teringatlah ia kepada satu ketika dia mencabut duri daripada kaki seekor singa di sebuah belantara.

Rupa-rupanya, singa itulah yang berdepan dengannya dan masih ingat kebaikan yang dilakukannya ketika binatang itu kesakitan.

"Malangnya tuan-tuan, itu adalah satu cerita dahulu. Cerita sebenarnya sekarang ialah apabila orang Kristian itu mencabut duri daripada kaki singa itu, maka singa yang hilang kesakitannya menerkam dan memakan orang itu.

"Jadi jaga-jagalah jika kita hendak mencabut duri daripada sesiapa," katanya.

Menjawab hujah wakil Kelantan, Encik Anuar Musa, yang memetik cerita Julius Caesar, Perdana Menteri berkata, Mark Anthony berhujah di kubur Caesar yang dibunuh berbunyi, "Segala keburukan yang manusia lakukan akan kekal dalam ingatan manusia, tetapi segala kebaikan akan ditanam bersama tulangnya."